




職方典第一百六十二卷

宣化府部紀事一

史記五帝本紀軒轅之時神農氏世衰炎帝欲侵陵諸侯諸侯咸歸軒轅軒轅乃修德振兵治五氣藝五種撫萬民度四方教熊羆貔貅驅虎以與炎帝戰于阪泉之野三戰然後得其志蚩尤作亂不用帝命于是黃帝乃徵師諸侯與蚩尤戰於涿鹿之野遂禽殺蚩尤而諸侯咸尊軒轅爲天子合符釜山而邑于涿鹿之阿

注

阪泉涿鹿在上谷釜山在媯州懷戎縣北

按懷戎即今懷來縣

古今註黃帝與蚩尤戰于涿鹿之野蚩尤作大霧兵士皆迷于是作指南車以示四方遂擒蚩尤而卽帝位

繹史元女兵法云黃帝攻蚩尤三年不下得一術士伍胥問之胥曰是城中之將白色商音帝之始攻得毋以秋之東方行乎今帝爲蒼色角音此雄軍也請以戰爲帝曰爲之若何曰請攻三日城必下乃設五軍五軍已具四面攻之三日城果下

國策燕王喜使栗腹以百金爲趙孝成王壽酒三日反報曰趙民其壯者皆死于長平其孤未壯可

伐也左右皆以爲趙可伐遽起六十萬以攻趙令栗腹四十萬以攻鄒使慶秦以二十萬攻代趙使

廉頗以八萬遇栗腹于鄒使樂乘以五萬遇慶秦于代燕人大敗

按鄒今高邑代今蔚州

鎮志燕王喜八年割平舒葛武陽易趙地時燕有易水長城而龍兌龍門臨樂與接趙有代雲中其

平舒葛武陽又近也燕以山後平舒葛武陽與趙趙以龍兌龍門臨樂與燕

平舒在蔚州西北葛武陽不可考龍兌龍門臨

樂俱爲古蔚屬地

燕王喜二十三年趙人來攻拔屬城時燕秦約好燕以太子入質秦秦張唐往相燕

將伐趙廣河間甘羅說趙王曰燕秦好欲以伐趙廣河間也王不如齎臣五城以廣河間請歸燕太子王與強秦攻弱燕失于此償于彼矣趙王從之燕太子歸趙攻燕上谷拔三十城

史記秦始皇本紀十九年王翦羌苑盡定取趙地引兵欲攻燕屯中山趙公子嘉率其宗數百人之代自立爲代王東與燕合兵軍上谷大饑

鎮志王次仲上谷人性能窺惻造化變通無窮隱居庸山中不爲祿仕上古蒼頡曾觀鳥迹制書歷世代用之然其文繁無所會據學者難爲次仲因其意旨更爲隸法簡略徑直急速即可成章時秦方燔書廢古訓官獄多事始皇得次仲書大喜遣使三召次仲皆辭不至始皇怒因令下杜程邈增

損其書行之以爲可施諸徒隸最便者也名曰隸書

通鑑綱目秦二世元年趙將韓廣略燕地自立爲燕王

鎮志

二世元年陳涉起謫戍首叛秦自立爲楚

王天下嚮應遣武臣張耳陳餘北略地至是耳餘聞他將爲陳涉略地還者多以讒誅勸武臣自立爲趙王遣故上谷卒史韓廣略燕地燕故貴人豪傑勸廣王燕廣以爲然遂亦自立

漢書高祖本紀五年七月燕王藏荼反上自將征之九月虜荼

鎮志

項羽入關徙燕王廣王遼東荼廣

將從羽入關羽立爲燕王高帝二年韓信下代定趙荼降爲漢至是荼反遣兵攻下上谷及代帝自將討荼虜之遣酈商以兵來定上谷將軍樊噲定代悉平高祖十二年周勃定代斬陳豨於當

城豨降將言豨反時燕王盧綰使人之豨所陰謀上使辟陽侯審食其迎綰綰稱疾食其言綰反有

端使樊噲周勃將兵擊綰

鎮志

帝旣虜臧荼立綰王燕及代相陳豨反綰與豨通豨誅其降將言之帝

乃使使召綰綰不就遂反發兵攻上谷帝遣勃討之勃破綰軍下薊得綰諸將相復破於沮陽追至長城綰亡匈奴乃還上谷定所劫十一縣

鎮志文帝十二年詔罪民入粟邊自贖晁錯上言石城十仞湯池百步帶甲百萬而無粟弗能守也

爵者上之所擅出於口而無窮粟者民之所種生於地而不乏使人入粟於邊以受爵免罪不過三歲塞下之粟必多矣

武帝建元六年赦邊郡軍吏不循法者時秦隴燕代間軍吏多不循法上曰邊民固不可內郡治也向所犯特赦之自今有犯仍如法

漢書武帝本紀元光六年匈奴入上谷殺略吏民遣車騎將軍衛青出上谷騎將軍公孫敖出代輕車將軍公孫賀出雲中驍騎將軍李廣出鴈門青至龍城獲首七百級廣敖失師而還

漢初兵革

少息高祖令歲轉山東粟數十萬石給關中至是匈奴入上谷殺略吏民乃遣將軍衛青出上谷塞伐之因增歲運至六十萬石以供軍餉青既出塞至龍城得捕首虜七百人還賜爵關內侯

元朔二年匈奴入上谷漁陽殺略吏民千餘人遣將軍衛青李息出雲中至高闕遂西至符離獲首數千級

鎮志

時匈奴數萬騎入上谷殺數百人太守郝賢從大將軍出塞斬首二千餘論功封衆利侯

元狩元年匈奴入上谷殺數百人

鎮志

時五月匈奴萬人入上谷殺數百人是秋渾邪王降漢發車二

萬乘迎之令居邊郡供費不貲府庫一空

元狩四年大將軍衛青將四將軍出定襄將軍霍去

病出代各將五萬騎步軍踵後數十萬人青至慕北圍單于斬首萬九千級去病與左賢王戰斬獲

首七萬餘級

鎮志

驃騎將軍霍去病出代擊匈奴破之匈奴左地遂空去病乃請徙烏桓諸郡分置上

谷及漁陽右北平遼東塞外置烏桓校尉擁節領之

鎮志元狩五年遣博士循行至郡廉察吏民自造白金五銖錢後吏民坐盜鑄錢死者數十萬人犯者益衆吏不能盡誅詔遣博士六人分循郡國舉兼并之徒及守相爲更有罪者

元鼎三年夏上谷饑

漢書武帝本紀元封元年行自雲陽歷上郡出長城北登單于臺至朔方臨北河勒兵十八萬騎旌

旗徑千餘里威振匈奴匈奴誓焉還祠黃帝於橋山

鎮志

駕征匈奴自遼西歷北邊祠黃帝橋山因出

長城巡視乃歸甘泉

橋山在安保州境上有黃帝遺祠

昭帝始元元年遣故廷尉王平等五人持節行郡國

鎮志

元年遣使來省風俗帝甫卽位卽命郡國守

相以春月行所至縣勸民農桑務節儉崇禮讓貧者振救之至是又遣朝臣十有三人分行郡國舉

賢良察風俗問民疾苦布朝廷恩德

鎮志成帝永始元年春上谷旱至七月雨

漢書平帝本紀元始四年遣太僕王惲等八人分行天下覽觀風俗

鎮志

四年遣使來采風謠時王莽

專政奏遣王惲等八人行郡國觀風俗採民間歌謠以上惲等還言天下風俗齊同詐作歌謠頌功德凡三萬言詔以惲等宣明德化萬國齊同皆封爲列侯

後漢書寇恂傳恂上谷昌平人也初爲郡功曹太守耿況甚重之王莽敗更始立使使者徇郡國曰先降者復爵位恂從耿況迎使者于界上况上印綬使者納之宿無還意恂勒兵入見使者就請之使者不與曰天王使者功曹欲脅之邪恂曰非敢脅使君竊傷計之不詳也今天下初定國信未宣使君建節銜命以臨四方今始至上谷而先墮大信將復何以號令他郡乎且耿府君在上谷久爲吏人所親今易之得賢則造次未安不賢則祗生亂爲使君計莫若復之以安百姓使者不應恂叱左右以使者命召况况至恂進取印綬帶况使者不得已乃承制詔之况受而歸及王郎起遣將徇上谷急況發兵恂與門下掾閔業共說况曰邯鄲拔起難可信向昔王莽時所難獨有劉伯升耳今聞大司馬劉公伯升母弟尊賢下士士多歸之可攀附也况曰邯鄲方盛力不能獨拒如何恂對曰

今上谷完實控弦萬騎大郡之資可以詳擇去就恂請東約漁陽齊心合力邯鄲不足圖也況然之乃遣恂到漁陽結謀彭寵恂還至昌平擊邯鄲使者殺之奪其軍遂與況子弇等俱南

彭寵傳更始立拜寵偏將軍行漁陽太守事及光武鎮慰河北至薊會王郎詐立傳檄燕趙遣將徇漁陽上谷衆多疑惑欲從之吳漢說寵從光武會上谷太守耿況亦使功曹寇恂詣寵結謀共歸光武寵乃發步騎三千人與上谷軍合而南光武承制封寵建忠侯及卽位吳漢王漢並爲三公而寵獨無所加愈怏怏不得志建武二年春詔徵寵遂發兵反分兵徇廣陽上谷右北平又自以與耿況俱有重功而恩賞並薄數遣使要誘況不受斬其使明年春寵遂拔右北平上谷數縣

王霸傳建武九年拜霸上谷太守十三年增邑戶更封鄉侯是時盧芳與匈奴烏桓連兵寇盜尤數緣邊愁苦詔霸將弛刑徒六千餘人與杜茂治飛狐道堆石布土築起亭障自代至平城三百餘里又陳委輸可從溫水漕以省陸轉輸之勞事皆施行注飛狐道在今蔚州飛狐縣北通嬀州懷戎縣卽古之飛狐口也溫餘水水經注曰出上谷居庸關東

光武本紀建武十五年二月徙鴈門代郡上谷三郡民置常關居庸關以東鎮十五年春匈奴入寇

詔大司馬吳漢將軍馬成馬武等擊之先是遣使通匈奴賂遺金帛以修舊好匈奴亦遣使來獻而單于驕倨自比冒頓帝方內平諸夏未遑外事而匈奴數與盧芳共侵漁陽上谷於是命吳漢等出塞擊之經歲無功而匈奴轉盛銳暴日增乃倍置邊兵大築亭障以謹備焉時匈奴寇抄日甚州郡不能禁因徙上谷及代鴈門吏民六萬餘口入常山并居庸關東以避之於是匈奴左部乘虛入居塞內

建武二十一年冬十月遣伏波將軍馬援出塞擊烏桓不剋匈奴寇上谷中山

鎮志

烏桓匈奴數連兵爲寇其在上谷塞外白山者尤強驚上因詔援行視上谷并代鴈門障塞援至高柳猝出

五阮關掩擊烏桓烏桓候者覺之相率逃避援追斬百餘級烏桓發兵尾擊援援晨夜奔還比入塞馬死者千餘匹

建武二十五年春正月遼東徼外貂人寇右北平上谷太原遼東太守祭彤招

降之烏桓大人來朝

鎮志

貂人一曰穢貂西漢時以其部居嶺東七縣置東部都尉光武建武六年省

都尉官遂棄嶺東地悉封其渠帥爲縣侯皆歲時朝賀至是連遭旱蝗赤地數千里草木盡枯人畜饑疫死耗大半因寇上谷又遼東烏桓大人郝旦等朝貢獻奴婢牛馬烏桓多願宿衛于是封其渠帥爲侯王君長八十一人留居塞內布于沿邊諸郡給其衣食令招來種人爲漢偵候助擊匈奴鮮

卑司徒掾班彪上言宜復置烏桓校尉府于是置于寧城開營府并領鮮卑質子互市 建武二

十五年烏桓大人率衆內屬二十六年南單于遣子入侍于是雲中五原朔方北地定襄鴈門上谷代八郡民歸于本土發遣邊民在中國者還布諸縣皆賜以裝錢轉輸給食鎮初帝徙吏民似失策及其貴州郡以防禦分謁者以轉輸馬援出視障塞王霸兼領屯兵未嘗一日忘邊土也卒之烏桓內屬南虜入朝戍兵大減徙口盡歸乃知安壤有道云

鎮志中元元年夏四月上谷甘露降

後漢書明帝本紀永平八年詔三公募郡國中都官死罪繫囚減罪一等勿笞屯朔方五原之邊縣其大逆無道殊死者一切募下蠶室亡命者令贖罪各有差凡徙者賜弓弩衣糧 永平十六年

春二月騎都尉來苗出平城伐北匈奴

鎮志

初匈奴分爲南北不相統攝至是北匈奴寇抄邊郡帝欲

遵武帝故事誅擊之詔來苗將上谷漁陽北平鴈門兵及烏桓鮮卑之衆出塞北匈奴聞之悉度募去無獲而還

鄧禹傳禹子訓建初三年拜謁者會上谷太守任興欲誅赤沙烏桓怨恨謀反詔訓將黎陽營兵屯

狐奴欲以防其變訓撫接邊民爲幽部所歸六年遷護烏桓校尉黎陽故人多攜將老幼樂隨訓徙邊鮮卑聞其威恩皆不敢南近塞下

和帝本紀永元五年二月詔有司省減內外廩及涼州諸苑馬

鎮志

時四方獻馬衆多內廩充滿因多

置外廩畜之其涼州等地水草豐美滋息又不可勝計適幽朔軍告征伐馬耗無以禦敵乃令有司發外廩并涼州諸苑馬給焉 永元十一年春二月遣使循行郡國廩貸災害不能自存者令得

漁采山林池澤不收假稅

鎮志

先是以旱蝗除田租及山澤稅至是又遣使循行廩貸及徵民間助義

者其有司一切苛政悉爲罷去使還各以郡國便宜事聞又令邊郡歲舉孝廉一人以弘仕路

元興元年九月遼東太守耿夔擊貊人破之

鎮志

時遼東貊人爲患詔發上谷烏桓兵擊之

鎮志安帝永初元月上谷大饑死者十四五

後漢書安帝本紀元初五年秋八月鮮卑入寇代郡殺長吏冬十月鮮卑寇上谷

鎮志

鮮卑初役屬匈奴

北匈奴破漸移居匈奴故地建武末遣使詣遼東太守祭彤求自效後其大人燕荔陽入朝詔封

爲王至是秋八月寇上谷燒官寺殺長吏詔發沿邊甲卒來屯十一月復攻居庸關仍詔前兵分據

要害禦之

建光元年秋八月鮮卑寇居庸關九月雲中太守成嚴擊之戰歿

鎮志

鮮卑入寇雲中太守成嚴功曹

楊穆來禦死之初遼西鮮卑大人烏倫其至鞬率衆詣度遼將軍鄧遵奉貢獻詔封烏倫爲率衆王其至鞬爲率衆侯至是鞬反攻居庸上谷嚴率兵來禦兵敗穆以身蔽嚴俱歿

鎮志順帝陽嘉元年冬烏桓校尉耿煜出塞擊鮮卑敗之初鮮卑來朝賀鄧太后令止烏桓校尉寧城下因築南北兩部質館鮮卑邑落百二十部各遣入質是後或降或叛邊人歲苦其害至是烏桓校尉煜擊敗之

桓帝延熹元年冬南匈奴及烏桓鮮卑入寇南匈奴效順久至是反連兵烏桓鮮卑抄掠沿邊諸郡是後鮮卑檀石槐者因其部落畏服推爲大人乃立庭於彈汗山兵馬甚盛盡據匈奴故地東接滅貊二十餘邑爲東部從右北平以西至上谷十餘邑爲中部從上谷以西至燉煌接烏孫二十餘邑爲西部各置大人主之

靈帝建寧二年烏桓反遂入寇初烏桓居上谷者其大人難樓有衆九千餘落至是反結遼西丘力

居遼東蘇僕延右北平烏延幾二萬餘落擾邊爲患

後漢書靈帝本紀熹平六年八月遣破鮮卑中郎將田晏出雲中使奴何中郎將臧旻與南單于出

鴈門護烏桓校尉夏育出高柳並伐鮮卑晏等大敗

鎮志

六年烏桓校尉夏育出塞擊鮮卑敗績先是

幽并邊郡歲被鮮卑寇掠至是育上言鮮卑寇邊自春已來益甚請徵幽州諸郡兵出塞擊之一冬

二春必能擒滅召百官議中郎蔡邕議止之帝不從遂遣育等三萬騎三道並出檀石槐命三部大

人率衆逆戰育等大敗奔還死者十七八

劉虞傳虞拜幽州牧初詔令公孫瓚討烏桓受虞節度瓚屢違節度積不能禁虞乃密謀討之時州從事公孫紀者知虞謀而夜告瓚瓚時部曲放散在外倉卒懼不免乃掘東城欲走虞兵不習戰又愛人廬舍勅不聽焚燒急攻圍不下瓚乃簡募銳士數百人因風縱火直衝突之虞遂大敗與官屬北奔居庸縣瓚追攻之三日城陷遂執虞并妻子還薊斬虞于薊市

三國魏志烏丸傳廣陽閭柔少歿烏丸鮮卑中爲其種所歸信柔乃因鮮卑衆殺烏丸校尉邢舉代之會太祖平河北柔帥鮮卑烏丸歸附遂因以柔爲校尉猶持漢使節治廣寧如舊

鮮卑傳文帝踐阼田豫爲烏丸校尉軻比能本小種鮮卑太和二年豫遣譚夏會詣比能女壻鬱築鞬部舍爲鞬所殺其秋豫將西部鮮卑蒲頭泄歸泥出塞討鬱築鞬大破之還至馬城比能自將三萬騎圍豫七日上谷太守閻志柔之弟也素爲鮮卑所信志往解喻卽解圍去

高貴鄉公本紀甘露元年夏五月黠及上谷並言甘露降

鎮志晉武帝太康元年分郡地置廣甯郡以沮陽居庸縣屬上谷下落涿鹿縣屬廣甯餘爲鎮分屬其郡守皆加將軍時監幽州諸軍事烏桓校尉唐彬開斥舊境復築秦長城塞分兵屯守烽堠相望是年幽州塞北有死牛頭語

晉書惠帝本紀元康四年秋八月上谷居庸上庸並地陷裂水泉出人有死者大饑九月赦州之遭地災者

鎮志

四年以郡境地震赦罪人時壽春上谷居庸上庸地震被災詔振貸特赦有罪吏民次年

又詔有司曰邊郡連年受敵或亡叛投賊其親戚留在本土不安者特赦之其逋債負皆勿收除舊嫌解禁錮復亡失官爵咸與更始焉

鎮志元康五年索頭來居塞外鮮卑索頭部世居漠北後漸南徙居匈奴地其可汗祿官用代人衛

操箕瞻等謀招集邊人部落漸盛至是分其國爲三一居上谷塞外濡源祿官自統之一居叅合陂北使兄子猗卽統之一居定襄之盛樂使猗卽弟猗盧統之

晉書王沉傳沉子浚懷帝卽位以浚爲司空領烏丸校尉又領冀州詔進浚爲大司馬加侍中大都督督幽冀諸軍事使者未及發會洛京傾覆浚大樹威令專征伐劉琨與浚爭冀州琨使宗人劉希還中山合衆代郡上谷廣甯三郡人皆歸于琨浚患之與琨相距遣燕相胡矩督護諸軍與疾陸眷并力攻破希驅略三郡士女出塞琨不復能爭

鎮志愍帝建興二年晉劉翰以郡地入遼西公段匹磾王浚旣謀逆心志益肆石勒僞遣表勸進浚信之不設備至是勒襲浚先驅牛羊數千頭聲言上禮遂入薊執浚殺之以晉尙書劉翰爲寧朔將軍行幽州刺史置諸守宰而還勒旣還翰以郡入于段匹磾

成帝咸和四年上谷相侯翕以郡地降于趙後趙石勒使石虎攻破段匹磾于厭次殺之匹磾弟牙立牙從祖就陞谷之孫遼殺牙立至是石虎攻遼遣將支雄等率步騎七萬爲前鋒長驅入薊遼所署上谷相侯翕及代相張收皆以郡降
咸和五年無麥禾饑

穆帝咸和六年燕取郡地徙其人山南冉閔篡趙國大亂燕王慕容儁圖兼并以兵南伐出自盧龍趙幽州刺史王午棄城走留將王他守薊儁攻破之斬他儁因都薊遷上谷廣寧人于徐無代郡人于凡城

帝奕太和五年秦伐燕取郡地秦王堅遣王猛伐燕滅之遂有上谷

孝武帝寧康二年蝗

太元元年秦遣侍臣來考政教秦王堅下詔曰往得丞相常謂帝王易爲自丞相違世鬚髮半白今天下既無丞相或政教淪替可遣侍臣分巡郡縣問民疾苦又匈奴別部劉衛辰素屬代至是叛以秦伐代代王什翼犍病不能戰奔陰山避之秦兵退犍遣庶長子寶君弒犍秦兵復至國大亂秦主堅誅寶君欲遷犍孫珪于長安長吏上谷人燕鳳請分代授庫仁及衛辰以須珪長堅從之分代爲二自河以東屬庫仁以西屬衛辰庫仁乃徙居上谷塞下秦珪甚謹 太元六年無麥禾饑

太元十年郡地復歸于燕劉庫仁死秦長樂公苻丕棄鄴走還晉陽于是河北郡縣皆復降于慕容垂是年垂自立定都中山號後燕

北魏書道武帝本紀登國二年二月帝幸甯川十一月遂幸赤城

皇始元年三月慕容垂來寇桑乾川至平城疾甚遂遁走死於上谷子寶僭立六月遣將軍王建等

三軍討寶廣甯太守劉亢泥斬之徙其部落寶上谷太守慕容普鄰捐郡奔走鎮志是時代屬魏上谷

屬燕慕容垂欲取代親將兵攻平城拔之魏主震怖諸部皆有二心垂過參合因見積尸如山爲之

設祭軍士慟哭聲震山谷垂慚憤疾作乃築燕昌城而還至沮陽卒魏聞之遂發兵命莫題王建攻

燕燕上谷太守鄰棄城走廣甯太守劉亢泥戰死于是悉降于魏

天興元年八月詔有司正封畿制郊甸端經術標道里平五權較五量定五度遣使循行郡國舉奏

守宰不法者親覽察黜陟之鎮志是時魏都平城去上谷廣甯甚邇其所遣使蓋首至焉

鎮志天興二年秋八月廣寧嘉禾生一莖十一穗告于宗廟九月東巡幸廣寧白兔見于乘輿前獲

之

北魏書道武帝本紀天興三年五月車駕東巡遂幸涿鹿遣使者以太牢祀帝堯帝舜廟

天賜四年正月行幸豺山宮遂如參合陂觀魚于延水至甯川